

Reglugjörð

138
30. nóv.

fyrir

eldvarna- og slökkvilið á Akureyri.

1. gr.

Yfirstjórn eldvarnarmála í kaupstaðnum skal falin 5 manna nefnd og eiga sæti í henni bæjarfógeti sem formaður, slökkviliðstjóri og 3 menn, er bæjarstjórnin kýs til 3 ára í senn.

2. gr.

Eldvarnarnefndin skal hafa eftirlit með, að hlýtt sje fyrirmælum laganna um varnir gegn eldsvoða, að eldsvarnaáhöld sjeu útveguð og þeim haldið við í góðu standi. Hún skipar fyrir um hið árlega eftirlit með eldstæðum, reykháfum, um hreinsun reykháfa og um varúð alla, er hafa skal í húsum til að fyrirbyggja eldsuppkomu.

3. gr.

Eldvarna- og slökkviliðið skiftist í þessa flokka.

I. Slökkvilið, er skiftist í

A. Slökkvívjelalið.

B. Vatnsburðarlið.

II. Húsrifs- og bjarglið.

III. Lögreglulið.

Fyrir hvern flokk um sig skipar eldvarnarnefndin yfirmann, undirforingja, varamenn og aðstoðarmenn eftir þörfum. Hún ákveður tölu liðsmanna í hverjum flokki og skipar fyrir um einkennisbúninga og merkiskildi.

4. gr.

Þegar brunakall er hafið, er slökkvívjelaliðið skyldugt til, svo fljótt sem mögulegt er, að mæta við slökkvívjelahúsið og það skal neyta allra krafta til að koma slökkvívjelunum að eldstöðvunum sem allra hraðast. Allir aðrir eru skyldir að mæta þegar við eldstöðvarnar.

5. gr.

Það er skylda slökkviliðsins að vinna að því af fremsta megni að slökkva eld, er upp kann að koma í kaupstaðnum, þannig að eigi standi hættu af að sinni og takmarka útbreiðslu eldsins svo sem mögulegt er.

Enginn slökkviliðsmaður má fara burtu frá eldstöðvum fyrri en yfirmaður slökkviliðsins gefur til þess merki.

138 Slökkviliðið er gegn hæfilegri þóknun, er slökkviliðsstjóri og bæjarfógeti 30. nóv. í hvert sinn ákveða, skyldugt til að kæfa eld í rústum og ryðja þær, ef þess er óskað.

6. gr.

Það er skylda bjargliðsins að bjarga úr eldsvoða mönnum og skepnum og verðmætum munum. Húsgirðingar og annað, er aukið getur eldinn eða hindrað slökkvívjelarnar, skulu þeir rífa niður að því leyti sem það er nauðsynlegt, eftir fyrirmælum slökkviliðsstjóra með ráði bæjarfógeta. Þegar eigi þarf á neinu slíku starfi að halda eru þeir skyldir til að aðstoða slökkvívjelaliðið.

7. gr.

Það er skylda lögregluliðsins að halda á reglu við eldsvoða og við æfingar slökkviliðsins, varna óviðkomandi mönnum að koma nærri eldstöðvunum, og má banna alla umferð um götur, þar sem þess þarf. Lögregluliðið skal gæta þess, að mannþyrpingar ekki hindri eða tefji slökkvívjelarnar eða aðrar liðsdeildir. Það sjer um, að inn í hús, sem í eldhættu eru, fari enginn maður, nema húsbúar sjálfir og bjargliðið. Það sjer um vörslu á björguðu góssi, annast brottflutning og aðhjúkrun þeirra, er fyrir slysum verða, vísar burtu eður tekur iasta þá, er sekir verða um brot og kærir þá.

8. gr.

Hinar nánari starfsreglur fyrir hvern liðsflokk um sig semur slökkviliðsstjóri með ráði eldvarnarnefndar og skulu yfirmenn flokkanna birta þær liðsmönnum sínum sem fyrirskipanir.

9. gr.

Slökkviliðsstjóri hefir á hendi allar framkvæmdir, er að eldvörnum lúta, og stjórnar slökkviliðinu í heild sinni við eldsvoða og við æfingar. Hann hefir eftirlit með slökkviáhöldum kaupstaðarins, heldur skrá yfir þau og sjer um, að þau sjeu í reglu og ætíð til taks.

Hann hefir eftirlit með því að yfirmaður hvers flokks færi nákvæma nafnaskrá yfir undirforingja, varamenn, aðstoðarmenn og liðsmenn í flokknum. Hann skal við störf sín bera einkennishúfu eða hjálm og hefir rjett á að bera einkennisbúning eftir ákvæði eldvarnarnefndar.

10. gr.

Bæjarstjórnin skipar slökkviliðsstjóra aðstoðarmann, er að öllu leyti gengur í hans stað, þegar hann eigi er við staddur.

11. gr.

Slökkviliðsstjóri má eigi fara burtu úr bænum, nema hann tilkynni það lögreglustjóra og setji, auk aðstoðarmannsins, annan í sinn stað til vara.

Sama regla gildir og fyrir yfirmenn flokkanna.

138
30. nóv.

12. gr.

Æfingar eldvarna- og slökkviliðsins ákveður slökkviliðsstjóri í samráði við bæjarfógeta og skal kvatt til þeirra með venjulegu brunakalli, en eldvarnarnefndin ákveður og auglýsir, hvernig brunnakalli skuli hagað.

13. gr.

Allir karlmenn á verkfærum aldri, sem heimilisfastir eru í kaupstaðnum, að undanskildum læknum, sóknarpresti, lyfsala og þeim mönnum, sem með læknisvottorði sanna, að þeir fyrir heilsubilun sjeu ófærir til vinnu, eru skyldir til að taka þátt í störfum eldvarna- og slökkviliðsins.

Hver sá, er eigi mætir tafarlaust á vettvangi, þegar er brunakall er hafið, eða sýnir óhlýðni eða móttþróa gegn fyrirskipun yfirmanns, skal sæta sektum eftir þessari reglugjörð. Við æfingar skal þó að jafnaði eigi beita hærri sektum en 25 kr., nema brot sje itrekað eða sjerstakar ástæður sjeu til.

14. gr.

Brof gegn þessari reglugjörð varða sektum alt að 50 kr., þar sem eigi er öðruvísi ákveðið. Sektirnar renni í bæjarsjóð. Verði stofnaður styrktar- og verðlaunasjóður fyrir eldvarna- og slökkvilið kaupstaðarins, skal úr bæjarsjóði greiða tillag í þann sjóð, er samsvari upphæð sektanna.

15. gr.

Reglugjörð þessi öðlast gildi þann 1. jan. 1909 og skal endurskoðuð þann 1. jan. 1911.

16. gr.

Reglugjörð þessa skal sjerprenta á kostnað bæjarsjóðs og útbýta henni til allra húsráðenda í kaupstaðnum og allra, er í slökkviliðinu eru.

Framanskráð reglugjörð, sem samin er og samþykf af bæjarstjórn Akureyrarkaupstaðar, staðfestist hjermeð samkvæmt lögum nr. 42 frá 20. október 1905 og birtist til eftirbreytni öllum þeim, sem hlut eiga að máli.

I stjórnarráði Íslands, 30. nóv. 1908.

Í fjarveru ráðherra.

Kl. Jónsson.

Jón Hermannsson.